

„Službene novine Federacije BiH“, broj: 3/03

Na osnovu člana 4., 9. i 25. Zakona o Agenciji za bankarstvo Federacije Bosne i Hercegovine ("Službene novine Federacije BiH", br. 9/96, 27/98, 20/00, 45/00 i 58/02) i člana 61. U vezi sa članom 69. Zakona o bankama ("Službene novine Federacije BiH", br. 39/98, 32/00, 48/01, 27/02, 42/02 i 58/02), Upravni odbor Agencije za bankarstvo Federacije BiH, donosi

**ODLUKU
O POSTUPKU ZA UTVRĐIVANJE POTRAŽIVANJA I RASPODJELE AKTIVE I PASIVE
PRILIKOM LIKVIDACIJE BANAKA**

Član 1.

Ovom odlukom se bliže propisuje postupak za utvrđivanje potraživanja i raspodjele aktive i pasive odnosno prioriteta prilikom raspodjele aktive i pasive u postupku likvidacije banaka.

Član 2.

Pod potraživanjem odnosno aktivom banke, u smislu člana 1. ove odluke podrazumijevaju se:

1. stavke aktive bilansa stanja banke; i
2. stavke vanbilansnih evidencija banke koje predstavljaju:
 - a) potencijalna potraživanja banke,
 - b) ranije otpisani kreditni i slični gubici i
 - c) stavke svih instrumenata koje je banka uzela od svojih dužnika za osiguranje naplate svojih potraživanja (kolareta).

Pod pasivom banke, u smislu člana 1. ove odluke, podrazumijevaju se:

1. stavke obaveza iz bilansa stanja banaka; i
2. stavke vanbilansnih evidencija banke koje predstavljaju njene potencijalne obaveze prema drugim licima kao što su npr. izdate garancije, izdati akreditivi i drugi slični instrumenti.

Svoja potraživanja, koja čine pasivu iz stava 2. ovog člana, vjerovnici su dužni prijaviti likvidacionom upravniku u skladu sa članom 61. Zakona o bankama (u daljem tekstu: Zakon).

Član 3.

Postupak isplate obaveza banke u likvidaciji provodi se po prioritetima u skladu sa odredbama člana 63. Zakona.

Isplata obaveza banke u postupku likvidacije vrši se u skladu sa planom likvidacije koji je sastavni dio izvještaja o finansijskom stanju banke sačinjenog od likvidacionog upravnika i odobrenog od Agencije za bankarstvo Federacije BiH.

Član 4.

Prebijanje potraživanja s protupotraživanjima moguća su samo uz pridržavanje redoslijeda prioriteta iz člana 63. Zakona.

Član 5.

Likvidacioni upravnik može svojom odlukom suspendovati isplate obaveza banke prema radniku banke protiv kojeg je pokrenut postupak za utvrđivanje odgovornosti zbog toga što je svojim činjenjem, odnosno nečinjenjem doprinio lošem finansijskom stanju banke. Ova suspenzija traje do okončanja postupka utvrđivanja odgovornosti radnika.

Suspenzija iz prethodnog stava se odnosi i na lica povezana sa bankom.

Član 6.

Od ograničenja postavljenih članom 3. ove odluke su izuzeti radnici koje u postupku likvidacije banke angažuje njen likvidacioni upravnik i to isključivo na osnovu angažmana tokom perioda tog postupka.

Član 7.

Stupanjem na snagu ove odluke, prestaje da važi Odluka o postupku za utvrđivanje potraživanja i raspodjele aktive i pasive prilikom likvidacije banaka ("Službene novine Federacije BiH", br. 3/00 i 53/00).

Član 8.

Ova odluka stupa na snagu danom donošenja, a objavit će se u "Službenim novinama Federacije BiH".

Broj 01-1-1190-16/02
19. decembra 2002. godine
Sarajevo
Predsjednik
Upravnog odbora
mr. Eldar Arnautović, s. r.